

太上紫微中天七元真經

元始天尊演化諸天上皇之劫 鎮治紫微中宮 大會說法 是時 紫  
微帝君 諸天眾聖真仙 七元真人 皆在慶會 聽說妙音 開度一  
切 誦詠洞章 無量光明 遍照十方 天上地下 九幽長夜 五道  
八門 囚徒謫役 餓鬼窮魂 受諸苦惱 結在北方天一黑獄 復見  
十方天堂 神仙靈館 真人神人 得道聖眾 衣食自然 逍遙快樂  
帝君稽首上白天尊 今日慶會 奇妙難言 睹見天堂 地獄 苦  
樂不同 壽夭窮通 貴賤差等 願垂教誨 令眾曉知  
天尊告曰 吾造立天地已來 經無數之劫 自下世俗人 淳消朴散  
妄想結縛 十惡牽纏 六賊居心 四蛇藏肺 行坐外息 不整容  
儀 咒詛讒誣 諂佞阿黨 不忠不孝 不愛不慈 不義不仁 多貪  
廣取 致被六天魔鬼潛攝精魂 五斗星辰旋促筭壽 非但不得長生  
久視 兼沈淪作餓鬼畜生 卿等七真 欲施惠救之 必須奉吾律令  
常以月三日 十五日 二十七日降下人間 檢括校勘 考遷功過  
糾察是非 廣演明威 光宣教戒 於是帝君乃命七元真君 交乾  
布斗 魁綱激指 上佐天關 而作頌曰

太上紫微中天七元真經

清微藏書閣

太上大道君

敕召主中天

檢括人功過

遷賞善惡緣

黑書令執勒

毫分不黨偏

第一樞星陽明真君延生咒

北斗延生

迴真四明

流暉下映

洞煥自然

七元紀籍

固侍體靈

靈真記名

上玄衛形

魂魄長存

耳目無驚

攝衛扶命

台真流行

保真自然

上昇玉京

第二璿星陰精真君度厄咒

北斗度厄

高真靈仙

流光輝映

保衛命生

七元保籍

自得長延

消滅艱危

災難移遷

臟腑開明

內外無愆

光運合景

與神同連

練化自然

上昇玉玄

第三機星真人真君保命咒

北斗保命

高靈散神

正炁攝伏

侍衛敬賓

七元上籍

運致玄真

流演靈明

契體同津

永辟不祥

內守形身

削死上生

與神敷陳

保舉自然 上昇玉晨

第四權星玄冥真君益筭咒

北斗益筭 流真散敷 光映下衛 與形同扶

七元度籍 同煥玄元 鎮護精神 保衛形軀

威神可衛 真靈駕浮 明視表裏 與神齊俱

保練自然 上昇玉虛

第五衡星丹元真君消災咒

北斗消災 四明開陽 上靈散玄 洞映神光

七元衛籍 司命延昌 明上紀名 使我延長

保固身命 除凶去殃 神真吐威 流演洞鄉

剋攜自然 上昇玉堂

第六閻陽星北極真君散禍咒

北斗散禍 玄映除凶 三光煥照 萬心流通

七元主籍 列位斗中 檢身護命 災殍不逢

上皇保真 命祿無終 正道長生 與神無窮

保形自然 上昇玉宮

太上紫微中天七元真經

清微藏書閣

第七搖光星天關真君扶衰咒

北斗扶衰 運致神精 南司保生 延壽體形

七元典籍 靈真營名 列位上司 合慶連并

丹靈散光 洞入玄冥 騰霄飛翔 與神齊靈

保我自然 上昇玉庭

天尊告紫微帝君 七元真君曰 若欲求長生久視 消災度厄 益筭

延年 解免愆過 可依吾教 別室供養 焚香燃燈 讀誦轉經 眾

真齊降 魔精消伏 斷滅不祥 過去超生 九幽息對 見存獲慶

永叶利貞 祿位昇遷 家門昌盛 君臣咸泰 天下和平

太上紫微中天七元真經竟

天運辛卯年亥月正一天師清微弟子洪鼎堅羅大英恭錄彙編